

daß es mit dem *Tournae* l'vberlein komme. Die-  
ses ist ihr Fleiß / ihre Sorg / ihre Arbeit / daß  
die Rechnungen recht gestellet / alles auff ein-  
ander gehe / vnd solte man eine Rechnung je-  
henmal endern / biß sie zutriffe / oder auch wol  
die Handschriften rectificieren / damit ihre  
Eynnamen vnd Außgaben zusammen treffen.

Dieses sind die gute vnd treuwe Dienste /  
welche solche Gesellen meistens theils irer Herr-  
schafft leisten / vmb deren willen sie auch wol  
von den Herren / so sich alles guten zu ihnen  
versehen / in hohen Ehren vnd Würden ge-  
halten werden: nötigen sie zu sich an ihre Taf-  
fel / thun ihnen alle mögliche Beförderung /  
nennen sie ihre Charissimos vnd Allerlieb-  
sten / als wann sie ihnen / wie die *Fata Argen-*  
*tina*, Goldt geschiffen hetten. Vnter dessen  
aber sind vnd bleiben sie *Factores*, oder viel  
mehr *Defæcatores*, die ihren Herren den v-

berigen Staub / oder Raumb abheben / rechte  
Buben / so die *Substantiam* auff sich vnter-  
stehen zu bringen / vnd lassen denen / so ihnen  
vertrauwen / allerhandt böse *accidentia*, ver-  
stäuben die *quantitatem*, vnd multiplicieren  
das *nihil*, vnd ist jnen als trägen Eseln zuwi-  
der / wann sie etwas guts thun sollen.

Wirdt aber nur von denen verstanden / so  
irer Herrschafft Gütern den Krebsgang ver-  
ursachen / vnd einen Durchlauff in der sel-  
bigen Eynkommen bringen. Hergegen aber  
findet man auch wol etliche / so auffrichtig  
vnd trew findt / denen / wie sie aller Ehren  
werth / ich auch meines theils alle Ehre vnd  
Wolffart wünschete: Den andern aber wider-  
fahre / was sie verdienen / daß ihnen endlich  
eine Krone werde auffgesetzt / oder ein Klei-  
nodt vmb den Hals gelegt / daran sie ersticket  
mögen.

ANNO TATIO

Vber den Sechs vnd sechzigsten Discurs.

*Nora*. Die vntreuwe *Factores* vergreifen sich an allen den zehen *Prædicamētis*. An der *Sub-*  
*stantia*, dann dieselbige verschwenden sie / oder stählen sie ihren Herren ab. An der *Quanti-*  
*tate*, dann sie lassen es nicht darzu kommen / daß man wisse / was irer Herrschafft Eynkom-  
men sey / vnd wie viel sie täglich darvon außgeben. An der *Qualitate*, dann die verderbte  
Wahren vnd Speisen sind ihre sürnembste Kauffmannschafft. An der *Relatione* / dann  
in allem ihrem thun referieren sie sich auff die Esel. An dem *Loco*, dann die Hurhäuser sind  
ihre sürnembste Gewöib / darinn sie iren Diebstahl auffhalten. An dem *Situ*, dann die Kü-  
che vnd Speißkammer ist ire beste Residenz. An dem *Habitu*: dann Winter vnd Som-  
mer stecken sie in einer groben vnd vngeschlachten Eselshaut. An dem *Tempore*: dann  
die Rechnung vnd *Journal* nemmen ihm alle Gedancken eines ganzen Tags hinweg. An  
der *Aktionē*: dann all ihr Thun vnd Lassen stehet in lauter Vntrew / vnd allerhandt Bu-  
benstücken. An der *Passione*: dann sie sind steiff / wie ein Pferd / das die Adern spannet / vnd  
können nichts guts thun: ist auch schad / daß sie nicht bey rechter zeit an den liechten Gal-  
gen gehencket werden.

Der Sieben vnd sechzigste Discurs.

Von Mackelern oder Kupplern / sonderlich in Heurathen / vnd  
in verdingung der Knecht vnd Mägde.

**I**Je jenige / so man sekunder  
Mackeler oder Vnterhändler  
nennet / sind vorzeiten bey den  
Römern vnd bey den Griechen  
*Proxeneræ* genennet worden /  
wie *Martialis* lib. 10. vnd *S. Antonius* parte  
*tertia summa*, tit. 8. cap. 4. bezeugen: allda sie  
auch in vnterschiedliche *species* vnd Gattun-  
gen getheilet werden / wie dann dieses ehrliche  
Handwerck sehr mannigfaltig / vnd sich wie  
die *Hydra Lernæa* je lenger je mehr vermeh-  
ret vnd außbreitet / vnd findet man in allen  
Geschäften / so in der Welt mögen vorlauf-  
fen / allezeit vnterschiedliche Mackeler vnd  
Vnterhändler / die sich darinn schlagen. Vn-

ter andern sind dieses die geschäftigsten / die  
sich in Kauffmannschafften / in kauffen / ver-  
kauffen / leihen / wuchern / tauschen / auch in  
allerhandt verbottenen vnd vngerbürlichen  
*Contracten* gebrauchten lassen: dabey sie denn  
gemeiniglich das beste thun / mit liegen / schwe-  
ren / verschweren / vnd allerhand Betrug / wel-  
ches jnen so gemein ist / als den Zigeinern das  
mausen / vnd den Seeräubern das zugreifen.  
Als zum Exempel: Kompt einer auff den  
Rossmarkt / vnd wolte gern einen schönen  
vnd rechtschaffenen *Saballen* vmb sein Gelt  
kauffen / findet sich also bald dieser Gesellen et-  
ner zu ihm / trägt ihm den allernützlichsten  
Seibel an / so auff dem ganzen Markt zu fin-  
den /

Auff dem  
Rossmarkt